

Tge è ina buna politica?

Pled d'avertura dal president dil cussegl grond Hans Peter Michel

■ **(cc) Tge è ina buna politica? Schebain che questa dumonda è forsa banala, è ella tuttina decisiva e duess adina guidar noss pensar e noss agir. Pia vegni giavischè da nus che nus fetschian buna politica er en questa sessiun.** Las respostas a questa dumonda fundamentala èn variadas, oz ma restrenscha jau ad ina risposta parziala, numna-damain: Buna politica è politica che ha success.

Co po il success vegnir quantifitgà

Co po il success vegnir quantifitgà? Ils criteris èn fitg differents, tut tenor il champ po-litic è la risposta in'otra. In indizi quantifitgabel è il success tar las elecziuns e tar las votaziuns. Questa cumprova dal success è magra, sch'ins vul crair a las bleras brevs da lecturas e da lecturs ed als commentaris da las ultimas emnas. Uschia n'èn trais votaziuns impurtantas betg vegnidas approvadas dal suveran entaifer in onn, e quai per part cleramain, per part mo per pauc. Ubain ditg cun auters pleds: Tar questas votaziuns na parta la maioritad da la populaziun ch'è ida a votar betg l'opiniun da la regenza e da la gronda part dal cussegl grond. Ils motivs èn multifars. Tschertins vesan il motiv èn ina tenuta da princip critica da la populaziun envers las autoritads, per auters èn las campagnas da votaziun pli u main effectivas responsablas per quest resul-

tat. La decleraziun ch'ins po udir lun-schor il pli savens e che vegn duvrada en spezial da bleras aderentas e da blers aderents dal sistem electoral da proporz è quella ch'il cussegl grond na represchienta la populaziun betg en moda represchenta-tativa pervia da la procedura electorala da maiorz ch'è – en quest cas – vegnida approvada in pèr giadas explicitamain dal suveran. Perquai na vegnian las votaziuns per part betg decididas en il senn da las autoritads. N'hajaz betg tema, jau na vi betg cumenzar da nov cun la debatta, mo in renviament: En connex cun ils blers arguments per u cunter las differentas proceduras electorales èsi cler, che las trais partidas burgaisas las pli grondas profiteschian dal sistem actual e perdessan sez, sch'il sistem vegniss midà. Tge resultat avessi dà en il cussegl grond tar quests trais projects, sche quel fiss in «parlament da proporz»? L'iniziativa «Gea ad electricitad netta senza forza electrica da charvun» è vegnida refusada en il cussegl grond cun 98 cunter 14 vuschs ed 1 abstenziun a favur da la cuntraproposta, la candidatura per ils gieus olimpics è vegnida approvada cun 96 cunter 14 vuschs ed 1 abstenziun ed il project per ina lescha davart las taxas turisticas è er vegnì deliberà cleramain cun 70 cunter 37 vuschs ed 1 abstenziun. Independentamain da la concepziun da la proce-dura electorala da pro-

porz fissan ils projects vegnids deliberads dal cussegl grond er en quest senn, schebain forsa en ina moda main clera. Entant che la minoritad sa chattava tar la PS e tar la PVL en cas da las emprimas duas fatschentas, è la lescha davart las taxas turisticas vegnida cumbattida – ultra da la pps – gist er da la pld che fiss forsa er stada ina da las perdidras tar la procedura electorala da proporz.

Trais projects impurtants èn vegnids refusads da pievel

Sistem electoral si, votaziuns gudagnadas giu, fatg resta che quests trais projects impurtants èn vegnids refusads.

Ina votaziun persa po savens vegnir cumparegliada cun in curridur che sto far il tem-po ed al qual ils auters curridurs n'èn betg en cas da suandar. Sias stentas èn invanas. Invanas? Savens, ma betg adina. En cas da votaziuns davart in augment da las taglias, en cas da projects, per ils quals il temp n'è anc betg madir u er en cas da fa-tschentas complexas sco la NGF dovri mintgatant duas u dapli emprovas. Duas modas da cumportament èn però da fitg gronda impurtanza per las autoritads. Per l'ina èsi indispensabel che la voluntad dal pievel vegnia realisada. Trics tactics per la-schar ir en il vid il verdict dal pievel destrueschan la confidenza da la populaziun en las autoritads e fan donn a las estructuras democraticas. Igl

è però precis uschia irresponsabel, da metter ils mauns ensemen suenter ina battaglia persa, tenor il motto: Ussa duain ils adversaris mussar, tge ch'els san! Suenter ina fasa da frustraiziun vali – e quai cun in engaschament cumplain – d'emplenir cun in cuntegn duvrabel las decisiuns da princip che la maioritad ha prendì, uschia ch'il niz per la generalitad è uschè grond sco pussaivel ed ils dischavantatgs pon vegnir tegnids pitschens.

Ina votaziun persa è ina sconfitta, ma er ina cumprova ch'ils andaments democratics funcziuneschan. Il di, il qual opiniuns dischagreablas vegnan taschentadas e critica vegn supprimida en ina moda pli u main miaivla, cumenza ina concentrasiun da la pussanza che vegn savens malduvrada da las persunas pussantas. Exempels per questa constataziun datti blers. La pussanza è il med per cuntanscher las finamiras, memia blera pussanza vegn savens malduvrada per finamiras persunalas.

Nus politicras e politichers guardain natiralmain che nossas missivas chattian ina maioritad. Anc pli terribel che perder ina votaziun fiss però da suttemetter al pievel mo pli projects ch'èn incontestads e ch'èn perquai per gronda part inutils. En nossa cumparegliaziun fiss quai circa uschia sco sch'il curridur ch'è responsabel per il tempo curriss suenter il triep nà. Igl è in fatg che las decisiuns

ch'èn bunas per il futur pon l'emprim savens esser constestadas e colliadas cun restricziuns persunalas. Per esser cumplet stoi er anc vegnir constatà ch'er la maioritad da noss cussegl po sa sbagliar. Maioritads n'èn mai ina cumprova per la correctadad.

Tgei dastga il pievel spetgar da nus politichers

Sco resumaziun pon ins dir ch'il bun cuntegna la buna intenziun ed il resultat positiv. Savens èsi intschert, sch'i dat in resultat positiv. La populaziun dastga però spetgar che nus politicras e politichers ans engaschian cun il meglier savair e pudair per quai che nus resguardain sco il meglier per il chantun e per ses umans. Jau sai che nus essan er mo umans e che nus guardain perquai sin quai ch'è in avantatg per nus. Nus ans engaschain per nus sez, per nossa ideologia, per nossa regiun, per noss segment da votantas e votants e per nossa partida. Quai n'è betg fauss. Impurtant è però che nus na perdian betg or da l'egl noss entir chantun. Quest engaschament per il bainstar general è avant maun en quest parlament, quai è mia ferma persvasiun. Igl è però necessari che nus ans rendian adina puspè da nov conscient da quest aspect general. Per il propi bun sto vegnir cumbattì mintga di. En quest senn giavisch jau a nus tuts ina buna sessiun.